



Trotzchöpf 1983

CLIQUE LIESCHTEL

Sujet 1988: Feschtival dü Video

- E läbigs Lieschtel, so hett mes vor Johre propagiert,
Lieschtel nümme Provinz, nei der Nabel vo dr Wält,
hett me plagiert!
- E neuu Rothuusstrooss mues do ane,
ohni Bus und Hundeklo, nundefane.
- Wäg mit de Trottoir, wäg mit de Auti,
es sell Platz geh, fürs ganz Johr e Gaudi.
- Wettbewerb sy usgrueffe worde durane,
wär ächt im Land die schönschti Strooss düeg plane.
- E huffe Lütt hai duruf und durab afo studiere,
der Ywohnerrot duet das schlächt gutiere:
Do, by dämdo fehlt d Station für e Bus
und das Projektli hett wenig Beizli duss.
Säll Vorhabe mitem Monorail isch z tüür,
by sällem isch der Architekt im Schilt nit ghüür.
- Drum wird beschlosse und verkündet;
Mir hainis mit Basel und ere Bank verbündet.
- E Feschtival sells in dere Strooss do geh,
ais, wie mes süscht niene cha gseh.
- Kei Filmfeschtival, wie New York oder Venedig,
das isch dene Bünzli im Komitee wenig.
- Nei, öppis Bsunders und Einzigartigs mues es sy,
mit emene Feschtival dü Video stygt me y.
- Und so chunts amene schöne Tag im Summer,
de Chrämer vo der I G L macht das Chummer.
- Lütt deuje Chischte ufmache und verschiebe,
der Mägli bechunnt e grossi Wand vor d Schybe,
Stüel wärde in Reih und Glied anegschtellet,
im Tatzelwurm wird d Durfahrt glatt vergellt,
e mängte Meter Kabel wird verleit und zämegschteckt.
Wos ans Probe goht, hoffe alli s syg nüt verreckt.
- Drei, zwöi, ais, so hetts töönt ussem Lutschprächer vordra,
kei Zwüfel, alli wüsse jetz: D Hauptprob fott a.
- Denn deuje Fraue mit blutte Körper über d Lynwand tänzle,
zum Samba-Rhythmus deuje si ihri brunä Ränzä schwänke.
- D Prob hett zeigt, es funktioniert und lauft,
e Mänge hett drufabe sys Billiet gchauft.
- Mit vill Spannig wird d Finschternis erwartet,
alli sy ufgregt, der Film wird gstartet,
chuum isch der Vorschpann dure,
hett scho ein e dummi Schnure,
will ein sy Schirm ufschpannt,
um sich vor de Tröpfli z schütze,
die hinde chönne luege und mache,
s duet alles nüt nütze.
- Vom Himmel duets immer wie meh obenabe schütte,
d Lütt, und vorus der Stapi, deuje ind Beize flüchte.
- Eso isch s Feschtival dü Video versoffe,
eus hett das nit im Gringschte troffe.
- Euses Feschtival isch hütt, morn und durane,
Fasnecht möche mir, nundefane!
Drei Tag duss uf dr Gass und in dr Beiz,
s Feschtival dü Carneval hett sy bsundere Reiz.

Und hesch am Zyschtig no nütt vor,
oder stoosch dehai vor verschlossenem Tor,
und isch dr d Fasnecht nonig verleidet,
denn chasch ins alte Züüghuus, au unverchleidet.
Vom Zwöi a stönde dört d Latärne vo Gross und Chly,
au eusi Lampe isch dört in voller Pracht derby.